

被擄者必獲釋宥。瞽者必獲開目觀光。爲傳諭大赦之年。賞善罰惡之日。云云。誦畢掩卷付侍者曰。古經之言。今日驗矣。斯時衆注目耶穌而聳聽之。然未諗其爲真主。相與私語及所自出曰。是某氏之子耳。若此大智靈蹟。從何得耶。耶穌曰。爾必欲我顯靈異事。如在葛發翁者乎。我實告爾。未有前聖而人不敬者。惟生於斯。長於斯。鄰里親族。未有能敬者也。耶穌竟不以靈異事。顯示此方。惟撫救數人病耳。爲此方人心多僞。而信不篤故也。維時陰謀加害。誘之出郭。臨高山之崖。擠墮深谷。耶穌無容遽害。稠人中往還。容與自如。

遣使傳教定規 第十三

耶穌遍行郡邑。廣布教化。乃見民衆如羊無牧者。心甚憫之。謂十二宗徒曰。穡事可獲者多。但收穫者寡矣。爾輩宜詢穡主命收之。其速往焉。第行必兩人俱也。復戒曰。爾且勿往異邦之鄉。但先救本國之民。失牧之羊者。且諭之以天國臨格甚邇。我授爾救病逐魔。及起死者之權。爾徒手受之。亦宜

徒手與之。勿以錢貝寔爾橐。勿以餼糧備久需。衣不可無。履僅可護足底。拄杖可携。彼工匠爲人力作。而人食之。爾爲人施教。有不得食者乎。凡入人邑。先問其可王者。旣入門。卽勿他適。且宜祝其家之安吉。倘彼能承。則爾所求必庇之。不則爾所求亦必被于爾躬。其有不聽信。拒爾不容者。爾宜出其疆域。卽履間之塵。亦宜去勿曳也。蓋至審判之日。雖索多抹與惡木辣兩地人。尚亦寬之。獨此不容不聽教者之刑。必不少貸也。索多抹惡木辣兩地人皆尚拂性男

色。天主深惡其罪。曾降天火。燼燬其地。與人矣。甚言不容傳教者之刑。更當重也。

諭宗徒傳道耐苦 第十四

耶穌明知將來傳道之難。預堅宗徒之心曰。我遣爾四遊。若驅羊於豺狼中。爾宜智如蛇。馴如鴿。彼以爾教爲異。而執訊於官於君。爾勿預思論答。顧其時。必有啟爾言者。蓋彼際所答。非爾輩自出。乃爾大父神告也。維時固有弟服爾教。兄異而訐之。子服爾教。父異而訐之者。蓋人之密邇。乃偏爲讐。第遭是冤苦。終不變志。方能自救矣。若此城迫。宜